



Auftrag: 3009371

Themen-Nr.: 140008

Referenz:

7e30c188-9958-4655-9550-3ddcb6bc1f2b

Ausschnitt Seite: 1/1

La Quotidiana

7007 Chur

081/ 255 52 52

<https://www.suedostschweiz.ch/laquotidiana>

Medienart: Print

Medientyp: Tages- und Wochenmedien

Auflage: 3'130

Erscheinungsweise: täglich

Seite: 1

Fläche: 3'526 mm²

Da vender a Glion: ina claustra


T'imaginescha che ti surfas forsa il schaner 2026 sin ina pagina d'immobiglias che venda chasas ed abitaziuns. E tuttenina fruntas ti sin in coloss d'in edificzi alv sin ina spunda

sulegliva amez la Surselva. Bain pussaivel ch'i sa tracta lura da la Claustra da Glion, ch'è oz il grond dachasa da las soras **dominicanas**. Ma quel dachasa è definitivamain memia

grond per la cuminanza che vegn adina pli pitschna. Vender è perquai in'opziun seriusa che daventa propi seriusa a partir da schaner 2026.

Vender la claustra da Glion ei ina opziun

Els plans pil futur dalla claustra da Glion ei la vendita ina dallas opziuns, actualmein quella che vegn favorisada dil cussegl da fundaziun. Quei ha la priura generala confirmau quei mardis.



La visualisaziun ord il studi da realisabladad ei ina idea co la claustra dominicana da Glion savess vegnir utilisada el futur.

VISUALISAZIUN MAD



«Igl ei era in grond levgiament, sche nus cattein in cumprader adattau.»

Sora Annemarie Müller, priura generala claustra dominicana da Glion

MARTIN GABRIEL/FMR

La priura generala sora Annemarie Müller ha informau mardis che la decisiun da publicar la claustra per la vendita seigi ina dallas opziuns dil project «Avegnir dalla claustra da Glion». «En nossa claustra a Glion vivan actualmein aunc 61 soras cun ina media da vegliadetgna dad 86 onns», di la priura generala. «Circa la mesadad da quellas soras vivan en nossa casa d'attempadas.»

Alla claustra dominicana baghegiada da niev igl onn 1975 appartegnan oz sper la cuminonza dallas soras era la Casa Sentupada cun 48 combras, la baselgia claustrala che vegn era duvrada fetg stedi per eveniments culturals, il Center da formaziun Surselva ch'ei affitader aunc entochen la fin digl onn da scola 2027/2028, e l'anteriura scola da puras cun combras e localitads. Tier la cumi-

nonza dalla claustra da Glion s'audan plinavon era las soras dominicanas en Brasilia ed el Taiwan. Sora Annemarie Müller e la gestiunaria dalla claustra Caroline Schweisgut han accentuau durent il café cullas medias ch'ei fussi ina incumbensa da mamut da vuler sligiar el futur sezzas tut las incumbensas che spetgien ils proxims onns. La fundaziun ha perquei envidau in biro extern e schau far quel in studi per mirar co l'immobilia dalla claustra duei vegnir utilisada el futur.

Aunc eisi buca vendiu

«Igl ei buc aschia ch'igl ei vegniu fatg nuot» ha la priura generala detg en discuers cun la FMR. «Nus planisein dapi onns nies futur ed jeu sun stada involvada el project «Avegnir dalla claustra da

Glion» da bial'entschatta.» La vendita seigi l'opziun decidida ch'ins hagi en mira ussa. «Per mei ha la decisiun d'encurir in cumprader duas varts. D'ina vart sun jeu dapi 36 onns part dallas soras dominicanas cheu sut quei tetg ed igl ei ina ponderaziun fetg speciala che la claustra ei in bi di buca pli nossa. Da l'autra vart eis ei era in grond levgiament, sche nus cattein in cumprader adattau che meina la claustra en in bien futur.» Mo oz seigi aunc tut aviert, ha sora Annemarie Müller detg.

«Incumbensa ei ademplita»

All'informaziun da medias dad ier mardis ha la priura generala sora Annemarie Müller argumentau cun plaids clars che la missiun dallas soras dominicanas seigi ademplita. «Sunter 160 onns ei igl apostolat, l'incumbensa dallas soras dominicanas en Surselva, ademplus. Quei surtut risguardond lur lavur sils secturs dalla diaconia e dalla formaziun. La cumi-

nonza dallas soras astga seretzer dalla veta publica ed investir sias forzas restontas per passentar sia sera dalla veta en cuminonza.»

Visiun en cass d'ina vendita

L'immobilia dalla claustra da Glion cumpeggia plirs tracts d'edificis ch'ei vegni construi entuorn la baselgia. Il studi da realisabladad presenta us la stad 2025 visualisescha il diever futur pusseivel dalla claustra (mira visualisaziun). Sper ils differents basegns datti era ina proposta pil dacasa futur dalla nova cuminonza dallas soras dominicanas (la part «Neues Kloster»).

Las localitads dil Center da formaziun dad oz vegnessan renovadas ed ei dess novas localitads da habitar en quei tract. Las ulteriuras parts dil baghetg savessan vegnir utilisadas per habitadis per famiglias e giuvenils sco era per localitads da lavur e produziun per commerci e cultura. La baselgia dalla claustra duei vegnir man-

tenida per la cuminonza claustrala e per producziuns da concerts e cultura. L'idea dil cussegl da fundaziun dalla claustra ei da realisar a Quinclas in quartier cun localitads aviartas per la vischnaunca dad Ilanz/Glion e dalla regiun.

Proxims pass

Tenor in scenari dil cussegl da fundaziun dalla claustra dominicana vegn la vendita dalla claustra publicada il schaner 2026. Ins quenta cun in onn da contacts e contractivas entochen alla vendita definitiva.

Alla fin digl onn da scola 2027/2028 banduna il Center da formaziun Surselva la claustra e lu savess ins entscheiver cun las lavurs pil niev habitadi dallas soras. Tenor la priura generala Annemarie Müller fussi ei ideal, sche las soras savesien bardigliar entochen la fin digl onn 2030. A quella midada suandassen tenor la visiun dad oz ils proxims pass da renovaziun e reutilisaziun dalla claustra.